



SURUHANJAYA PILIHAN RAYA MALAYSIA

KENYATAAN MEDIA

Bil. 63/2019

PROGRAM PENDIDIKAN PENGUNDI BERSAMA POLITEKNIK KUCHING, SARAWAK

1. Suruhanjaya Pilihan Raya (SPR) melalui Akademi Pilihan Raya (APR) telah memperkenalkan Program Pendidikan Pengundi pada tahun 2017. Program ini bertujuan untuk memberi kefahaman terhadap proses sebenar pilihan raya yang dijalankan di Malaysia di samping menjawab isu-isu pilihan raya yang mengelirukan rakyat khususnya kepada golongan belia dan pelajar. Program ini juga memberikan pendedahan, ilmu pengetahuan serta mendidik masyarakat mengenai erti demokrasi dan pengurusan pilihan raya yang diamalkan di Malaysia.
2. Pada tahun 2017, Program Pendidikan Pengundi yang dijalankan memberi tumpuan kepada pelajar Institusi Pengajian Tinggi. APR telah menjalinkan kerjasama strategik bersama Universiti Awam dan Swasta, Politeknik, Kolej Komuniti, Institut Latihan Kementerian Kesihatan Malaysia (ILKKM) serta Institut Pendidikan Guru (IPG). Hasilnya, sebanyak 102 program pendidikan pengundi telah berjaya diadakan dengan penyertaan seramai 31,355 pelajar berumur 18 hingga 26 tahun.

3. SPR telah memperluas jalinan kerjasama strategik bersama Majlis Amanah Rakyat (MARA) dan Kementerian Belia dan Sukan (KBS) pada tahun 2018. Golongan sasaran penyertaan program juga dilanjutkan kepada pelajar sekolah menengah Maktab Rendah Sains MARA (MRSM) melalui Pendidikan Sivik. APR telah menganjurkan sebanyak 126 program dengan penyertaan seramai 27,585 peserta termasuk 4,563 pelajar dari 25 buah MRSM seluruh negara.
4. Bagi tahun 2019, SPR telah memperluaskan hubungan jalinan kerjasama strategik bersama Bahagian Matrikulasi (di bawah Kementerian Pendidikan Malaysia), Jabatan Penerangan Malaysia (di bawah Kementerian Komunikasi dan Multimedia Malaysia) dan Institut Latihan Jabatan Tenaga Manusia (di bawah Kementerian Sumber Manusia). Golongan sasaran penyertaan program juga diperluas kepada pelajar sekolah harian hasil kerjasama dengan Kelab Malaysiaku di bawah naungan Jabatan Penerangan Malaysia.
5. SPR berhasrat untuk mendekati lebih ramai golongan muda termasuk para pelajar dari sekolah berasrama penuh sehinggalah ke pelajar sekolah harian. Berdasarkan hasrat ini, SPR telah melancarkan Program APR Associate Trainer (AAT), yang merupakan satu projek bitara di bawah kendalian APR yang bertujuan melahirkan penceramah-penceramah yang terlatih di seluruh negara bagi menyampaikan maklumat tentang sistem pilihan raya di Malaysia. AAT dipilih dari kalangan mahasiswa universiti dan penjawat awam yang mempunyai tahap kesukarelawanan serta menunjukkan komitmen yang tinggi.
6. Untuk makluman, Taklimat Pendidikan Pengundi dan Pendidikan Sivik kendalian SPR ini hanya menerangkan tentang fungsi SPR, proses pilihan raya yang merangkumi simulasi pengundian dan pengiraan undi

serta menjawab isu-isu dan cabaran berkaitan pengurusan pilihan raya. Program ini tidak menyentuh mengenai ideologi dan perjuangan mana-mana parti politik. Pendedahan awal mengenai hak dan tanggungjawab mengundi kepada golongan sasaran ini boleh menjadikan mereka lebih bersedia dan memahami tanggungjawab sebagai seorang warganegara. Mereka ini akan menjadi pengundi yang lebih matang dan faham akan hak serta tanggungjawab mereka sebagai pengundi seterusnya dapat memilih pemimpin yang berwibawa pada masa hadapan.

7. Pada ketika ini, SPR melalui Akademi Pilihan Raya (APR) sedang membangunkan satu modul latihan baharu untuk memastikan kelancaran perjalanan pilihan raya. Modul yang dikenali sebagai High Impact Smart Training (HIST) akan digunapakai oleh APR dalam sesi latihan yang akan dikendalikan. Modul ini akan melibatkan penilaian yang lebih menyeluruh dan berkala secara atas talian (online refresher course dan knowledge update).
8. Untuk mengetahui maklumat dan aktiviti berkaitan dengan Program Pendidikan Pengundi serta maklumat lain berkaitan dengan proses pilihan raya, sila layari /hubungi :
 - Portal: votereducation.spr.gov.my
 - Facebook : Akademi Pilihan Raya
 - E-mel : akademipilihanraya@spr.gov.my

Sekian, terima kasih.

AZHAR AZIZAN HARUN

Pengerusi

Suruhanjaya Pilihan Raya Malaysia

Tarikh: **25 Jun 2019 / 21 Syawal 1440H**